

Euroaren sorrera Moneta bakarraren lehen eguna

Finantzen mundua jo eta su lanean

Finantza sektoreko 50.000 lagunek lan egingo dute asteburuan moneta bakarrera egokitze

Agentziak / Brusela

Hilabeteak daramatzate aldaketarako prestatzen, eta asteburu honetan dute azken txanpa. Guztiak prest egon behar du astelehenean, banku, finantza entitate, kreditu etxe eta abarretan. Etorri da euroa.

HISTORIAN lehen aldiz, finantza sektorean hamaika dibisen transakzioen aldi bereko konbertsioa egin behar du. Euroaren etorrera prestatzen hilabeteak daramatzate, baina egun historiko hauetan lana inoiz baino gehiago erlojupean, eta jaiegunetan, egin behar dute banku, burtsa eta hainbat finantza entitatek.

Ospakizun eta adierazpen politikoak amaitu bezain laster, euroaren truke balioak ezarriak izan bezain laster, Europa osoan euren sistemak berritzeari ekin diote guztiek, baina moneta bakarrean sartu diren herrialdeetan, baita handik kanpokoe-tan ere. Finantza sektoreko 50.000 lagun ariko dira asteburu honetan lanean. Ekonomia ministroek ezarritako paritateak orain ordenagailuetan sartu behar dira, eta milioika operazio, kontu, kartera, balantze eta sistema berri behar dira, astelehenean merkatuak zabaldu aurretik.

Entiteen ospea dago jokoan. Bai eurozonan bai kanpoan ez luke asko iraungo astelehenetik aurrera euroarekin lan egiteko gai ez den edozein

etxe, banku edo finantza bitartekarik.

Horregatik, baliabide guztiak jarri dituzte asteburu honetarako. Bruselan, esaterako, Belgikako lau banku nagusiek —Generale de Banque, BBL, KBC eta Credit Communal— 2.000 lagun mobilizatuko dituzte astelehenera bitartean.

Moneta bakarretik kanpo gelditu den Erresuma Batuan ere jo eta ke ariko dira, hiriburuko finantza zentroan, City ezagunean. Europaz kanpoko finantza entitateak ere ez dira salbu. Adituen arabera, Merrill Lynch inbertsio banku estatu batuarrek 79 milioi dolar xahutu ditu moneta bakarera egokitzen.

EBZren irudia jokoan

Frankfurten egoitza nagusia duen Europako Banku Zentralean ere 70 ordu hauek larrialdi egoeran bizi dituzte, baita hamaika errialdeetako banku zentraletan ere. Europako Banku Zentralen Sistema deituriko sareak egokitze operazioen garapenari buruzko informazioa banatzeko larrialdiko komunikazio prozedura bat jarri du martxan. EBZren prestijioa jokoan dago, asteleheneko euroaren bataioaren atarian.

Astelehenera bitarteko 70 ordu hauetan EBZren zuzendaritza osoa, lehendakari Duisenberg barne, aurkitzeko moduan egongo da badaezpada ere, maila goreneko erabakirik hartu beharko balitz ere.

Enpresa handiek soilik jarriko omen dituzte kontuak eurotan

Efe / Madril

BANKU eta aurrezki kuxetako bezero gehienetsuenek pezetatan eta liberatan gordeko dituzte euren gordailuak, eta enpresa edo korporazio handiek soilik aldatuko dituzte euren kontuak eurotara. Hala adierazi dute finantza entitateetako ordezkariak behintzat.

Entitate horiek beharturik daude astelehenetik aurrera euren produktu guztiak (kontuak, maile-

guak, helbideratutako ordainketak, transferentziak eta abarrekoak) eurotan ere eskaintzeko. Baina aukera horretaz bezero gutxi baliatuko diren ustea zabalik dago banku nahiz kutxetan.

Horren inguruan, entitateen araua «ez debekatu ez behartu» izango da hiru urteko igarotze epean, jakinik eurotan lan egitea eskatzen duten bezeroei ezin izango zaiela inolako kosturik eskatu.



PHILIPPE HUGUEN / EPA

Eurofamilia txanpainarekin topa egiten. Moneta bakarrean sartu diren herrialdeetako finantza ministroek topa eginez ospatu zuten euroaren jaiotza; eurofamiako argazkia.



BERND KAMMERER / AP

EBZeak jo eta ke.

Hilabeteak daramatzate lanean hainbat funtzionarioek Europako Banku Zentralak Frankfurten duen egoitza nagusian. Asteburu hau bereziki gogorra egingo zaie, astelehenean martxan jarriko diren finantza ekintzetan inolako akatsik egon ez dadin guztiak zuzen egon behar duelako. Euro asko dago jokoan.



SINEAD LYNCH / EPA

Euroa City-n. Erresuma Batua ez da sartu Moneta Batasunean, baina horrek ez dio lanik aurreztu Londresko City-n. Argazkian, Merrill Lynch finantza entitateko buru Joseph Willet (ezkerrean) euro billetea eusten, bere lankide batzuekin batera. Badaezpada ere, bostehunekoa.